

www.BibleForChildren.org

Génesis 3




Ja jonin jawen awin janea iká iki,
Eva, jara jatíbi joni jiriabaon tita iki.



Ronora jatíbi ináatima yoinabo
xewina paramisti onan Ibo Diossen
jonia iká iki, jatianra ainbo yokata
iki: —¿Jaskara ikenki, Diossen mato
yoia iki, nato jakon jati wainkonia,
jawerato yobín jiwi bimibi
kokotima? —akin.



Jatianra ainbaon
yoia iki: —Wetsa jiwi
bimi inonbiresa nato
jakon jati wainkonia non
kokoti atipanke. Ikaxbira, jakon jati wai
napo iká westíora jiwi bimibichores, noa
Diossen kokotima yoia iki, jainxon tii
atimaribi yoia iki. Ja
kokoaxbira noa mawáti
iki —akin.



Jaskábira ronon
ainbo yoia iki: —Ja
mato jaskáakin yoiara
ikonma iki. Matora
mawáyamai. Diossenra akonbireskin
onanke, ja jiwi bimi kokoxon maton jakon,
itan jakonma onanti, jaskara onanaxa
mato Dios keskaribi
iti iki —akin.



Ja ainbaon jiwi bimi oinnara iká iki,
iorai metsá jan keentishaman, jatianra
ja bimi kokotinin keenshamana iki,
jaskáaxon jawéki ati onan shinan biti
iketian. Jaskara iketian westíora bimi
tesaxon kokoa iki.



Jan aká pekáo jawen bene menia iki,
janribi kokoa iki. Ja akátianbi jaton
shinan chopeta iki, jatian ja rabéxonbi
onanna iki moa chopaoma. Jaskara
ixon, higuera janeya jiwi
pei kexexon ja
sawebekona iki.





Jaskákenbira Ibo

Diossen, Adán kenaxon yokata

iki: —¿Miaki jawerano iki? —akin. Joninra yoia

iki: —Nato jakon jati wainko joax, mia kawanaitian
ninkataxa chopoma ikax; miki raketi ea
joneke —akin.





Jatianra Diossen

yokata iki: —¿Tson yoiaki min onanna,
mia chopaoma? ¿Ja jiwi bimi kokotima
en yoia ikenbiki, min kokoa? —akin.



Joninra yoia iki: —Jabé janon ixon min ea menia
ainbaon bimi meniara en kokoke —akin.
Jatianra Ibo Diossen ja ainbo yokata
iki: —¿Jaweati min jaskáamarin? —akin.
Jatianra jan yoia iki: —Ronon ea parana
kopí, ja bimi en kokoa riki —akin.





Jaskara iketianra, Ibo Diossen Edén
mainko iká, jakon jati wainkonia ja joni
pikoa iki. Jaskáaxonra, ja main
teenon ixon ja joni imaa iki,
ja maibi aká ixon.




Ja joni pikoa pekáora, bari pikotaiori
iká jakon jati wainko, querubín janeya
peiabo imaa iki, itan chiibires
espada jatíbiori mayatairibira
imaa iki, ja jiwé jiwinko tsoabi
nokótima kopíra
aká iki.



Adánman jawen awin Eva yorana tootax ja bake pikota iki, jawen jane iká iki Caín. Jaskáketian, Adán neskata iki: “Moara ea westíora benbo bakeya iki, Ibon ea menia riki”, iki. Japekáo Abel pikota iki, ja Caínman wetsa. Ja Abel iká iki, carnero kaiai; jatian Caínbiribi iká iki, waín teetai.




Jaskata pekáo basi iikin, wetsa nete Caínman aká iki,
jawen waimea bia yoábo boxon Ibo menikin.
Abelninbiribi Ibo boxona iki, carnero
bake reken pikota jakonshamanbo.
Jatianra Ibon oinna ja Abel itan ja
Ibo meninoxon boá jawekibo,
jawen keenshaman iká iki.



Ixonbi Caín jaskáakin oinyamaa iki, ja meninoxon boá oinna jakonmaribi iká iki. Jaskáketian Caín, ikonbiresi sinatax jawen beísa jakónmabires iká iki.



Wetsa netera, Caínman jawen wetsa Abel, chankakin
ioa iki, jatian kachio jato rabébicho ixonra, Caínman
jawen wetsa Abel retea iki.



Jatianra Caín Ibon yokata iki: —¿Min wetsa Abelki jawerano iki? —akin. Jatianra Caínman yoia iki: —Enra onanyamake. ¿Eaki já koirannai iki? —akin. Caínra jainoax Ibo betan yoyo ikainoax moa kaa iki, jatianra kaax Nod janeya mainko jaa iki; jara Edénhainoax bari pikotaiori iki —akin.



Adanmanra jawen awin betan yoranribia iki, jatianra benbo bakeaxon janea Set iká iki, jatianra neskata iki: “Abel, Caínman retea toanra Diossen ea wetsa benbo bake menike”, iki.



Jaskata pekáo Adán japia iki, posaka pacha
baritiapari, jainoax wetsa jawen benbo bakebo
itan ainbo bakebo jaribaa iki. Jaskataxa jatíbi
jawen baritia Adán jaa iká iki, iskon pacha
kimisha chonka baritia; jatí baritiayanixa,
mawata iki.



Ibon oinnara jonibaon aká nato main
bebonbires jakonma iká iki, jaton
shinanra jatíbitian jakonma atires iki,
jaweati en joni akárin ikira iká iki.



Kikinni chexakaatira neskata iki: “En aká
jonibora, nato mainmea tsoabi yamatiakin
en jato keyoai, jatíbi yoinaboribi, main
norex iki niaibo jainoax noyai yoinabo.
¡Ayamapainon en jato akárin ikíra
ea ikai!” iki.



Jaskara ikenbira, Ibon oinna Noébichores jakon iká iki. Noéra kimisha benbo bakeya iká iki, jabaon jane iká iki, Sem, Cam, Jafet.



Akonbireskin nato netemea jonibo
noixonra, jawen jabicho bake jato
Diossen menia iki, jatíbi já ikonhaibo,
mawáyamai jatíbitian
jati neteya ikanon ixon.



Romanos 3:23 Jatikaxbira ochakana iki, jaskara kopíra moa Dios betan iamai, ochókana iki.

Romanos 6:23 Ochan kopí riki mawá, ikaxbi jawe kopímabi noa Diossen meniai riki, jawen jatíbitian jati nete, non Ibo Jesucristo betanbi itaanan.

Hebreos 9:27 Jatíbi jonira westíoraibicho mawatai, jaskata pekáora jaton akábo kopí jain bokantibo jato yoixonti nete nokotai.

Efesios 2:8,9 Ja maton ikonhaa kopíresa, jakon shinanya ixon, Diossen mato kishpinmaa iki, jakon jawéki maton aká kopíma, jara jawe kopímabi, mato Diossen imaa iki.



Romanos 10:9,10 Jaskara ikaxa, tsoabi jawebi rabíresti atipanyamake, jaton koshinbi ikanama ikax. Jawetianki min kexakanbishaman, Jesús riki nokon Ibo iki mia ikai, itan mawákenbi Diossen jirimaaribi, jointiaxonbi min ikonhai, jatianra mia kishpinmeeti iki. Non jointinin riki, Dios ikonhati jakon joni inoxon. Jatian kishpinmeeta inoxonra, non kexakanbishaman, Jesús riki nokon Ibo, iki noa iti jake.

Juan 3:16,17 Akonbireskin nato netemea jonibo noixonra, jawen jabicho bake jato Diossen menia iki, jatíbi já ikonhaibo, mawáyamai jatíbitian jati neteya ikanon ixon. Nato netemea jonibo masá tenemati kopíra ayamaa iki, Diossen jawen bake nato neten raankin. Janra raana iki, jan akinnaton nato netemea jonibo kishpinmeekanon ixon.



1 Juan 5:11-13 Jatian ja Diossen yoiai riki, noa jatíbitian jati nete menia, jatian ja jati nete iki jawen Bake ikonhaxon biti. Jaweratoboki moa ja Bake betan iki, jabora moa jati neteya iki, ikaxbi jaweratoboki ja Bake betanma iki, jabora jati neteoma iki. Enra ja Diossen Bake ikonhaibo iketian, mato neskarabo wishaxonai, moa jatíbitian jati neteyabo mato ikanai maton onannon ixon.



Génesis 3 – 6

Storyline by: Edward D. Hughes

Illustrated by: Byron Unger, Lazarus
and Alastair Paterson

Adapted by: M. Maillot; Tammy S.

Shipibo Conibo Bible (shp) © 2011, Wycliffe Bible
Translators, Inc. All rights reserved.

<https://live.bible.is/bible/SHPTBL/GEN/1>

©2025 Bible for Children, Inc.

www.M1914.org

www.bibleforchildren.org

